

吉水縣志卷四十

吉水縣知縣關中米嘉績纂修

外志一

邑有外志所以附諸別錄以異於正編者也夫非務淵博炫竒異也義之所不得棄也是以易有雜傳莊子有外篇雜篇左氏韓詩皆分內外傳釋義尚然又何怪乎紀載之書有緒餘之摭撫哉然而外志之名雖一而其義則有數焉或以其非此地所產或以其非網常所存或以其非祀典所載或以他地而實收

或以逸事而酌取或理之所無而爲事之所有或時之所遭而非意之所及凡若此者皆以例外之外之者以有所不得外焉者也

寓賢

吉邑山川蜿蜒風俗敦龐自置邑以來文章節義之士繼踵而起故名儒碩彥過茲土者未嘗不攬轡徘徊而不忍去語曰里仁爲美其斯之謂歟若夫扶輿清淑間氣攸鍾寄帑者往往長子孫而掄高第斯固魯多君子然亦地靈人傑有以致之考之載籍宋元諸大儒皆常盤桓斯邑然名賢足跡幾遍寰區一日之遊奚必藉以爲美談哉而所謂流寓諸人要皆高風雅操號爲賢達者始登載焉他如舊志所書止存姓名而無事實者今亦仍而不削諺云水源木本誰氏無之凡若此者概不採增斯亦所以尊前人而信後世也夫

南唐

劉洞廬陵人隱居吉水之南山能詩自言得賈島法後主嗣位尤屬意詩人或以洞言者洞遂獻詩百篇卷

首石城篇其詞石城古渡頭一望思悠悠幾許六朝
事不禁江水流後主讀之感愴不怡者久之因棄不
復觀洞亦不復見省南唐亡洞過故宮徘徊賦詩多
感慨悲傷不以不遇故有怨懟語未幾卒

採南唐書

及解文毅集撰

宋

毛休浙江人宋開寶間來守吉州因家龍城徙居仁壽

鄉七都稱世家焉

舊志

羅拯字時濟宋景祐間任吉州推官有善政因民拔留

宦寓本邑文昌鄉鼓鳴岡今山原華山周橋諸羅氏

其裔也

羅註湖集

馬彥光宋景祐間任吉州司李因家焉

舊志

趙不侑字謙冲宋太宗長子漢王房七世孫建炎二年

授忠翊郎扈從而南知饒州監吉太和令兩監潭州

南嶽廟入覲爲忠正寺判官秩滿除知永州改提舉

江州太平興國軍所向皆有廉名賜紫魚袋階升武

經大夫勲爲武騎尉爵爲吉水開國子食邑五百戶

因家焉卒贈中奉大夫

同上

莫伯符武寧人乾道五年吉水主簿攝學事勸農營田
遂家縣之南坊 同上

廖謙任吉陽令得民心致仕家於邑之中鵠鄉東溪里
同上

胡洪範環州人寓居邑西城宋咸淳間國學生因星變
應詔上書詆賈似道專權誤國似道怒欲置之死太
學諸生伏闕申救不允丞相江萬里復抗疏力言其
無罪遂得釋歸憂憤而死 同上

元

曾彬叔字俊玉新淦石坪人泰定間登張益榜進士徙
居仁壽鄉文林山 同上

姜天祐字孝祥四川重慶人以父蔭補吉安路都稅使
司提領弟慶祥贅仁壽鄉三都盧兜王氏遂家焉至
正十二年壬辰群盜蜂起天祐與校書郎解子元及
大安羅啟南率衆拒寇保障鄉閭遇敵敢勇與子元
力戰而死太守壯之立忠義祠以祀焉 同上

吳當字伯尚臨川人學士澄之孫也幼以篤厚稱逮澄
捐館四方從澄遊者悉就當卒業至正間與修遼金

宋三史累官翰林直學士江南兵起大臣薦當才特授江西廉訪使募民兵由閩轉鬪而西復建撫二郡叅知政事總兵彘歹忌其功誣通賊左遷撫州路總管復為平章火你赤譖有旨除名仍供億火你赤軍及尚書黃昭上功狀乃起中奉大夫江西行省叅知政事命未下而陳友諒已盡陷江西諸郡火你赤遁去當黃冠道服杜門不出友諒遣使辟之卧牀不食以死自誓使者舁牀至江州拘留一年終不屈友諒敗遂隱居吉水之谷坪逾年以疾卒所著有周禮纂

言及學言藁 元史

胡士良建昌南豐人任吉州稅使遇兵變流滯吉水遂為吉水人時山寨劫掠鄉村眾莫能禦士良傾資財從蘭溪魯萬中兄弟率眾保障大有所濟鄉人德之

舊志

陳彥佐江州人至正間仕至光祿勳謫居吉水之北門

孫存道舉明經授副提舉遷潮陽知事 同上

陳宗舜字村民元至正進士授贛州路儒學教授明初典江西文衡洪武中與考會試所得多名賢若解學

吉水縣志 卷四十一
士縉其一也晚家吉水文學爲遠近所宗 永新縣志

明

單執禮順天宛平人洪武間由福建道御史謫吉水縣

丞卒寓南坊 舊志

高仲實洪武間爲知縣卒於任寓居南坊 同上

楊茂埜天台人任訓導卒於任寓居學宮北 同上

李元芳季芳昆明人俱知縣智子成化間智官吉水有

善政號清白吏以禱雨致瘁卒二子遂占籍一都爲

諸生至今相傳爲清白吏後云 周志

方術

儒者崇正學以道德仁義爲宗而二氏與曲藝家皆
卑之無足齒者也然小道可觀亦昔賢所不廢僚九
秋奕時或稱焉苟非冥心專力屏絕外誘未能或至
也而世俗貪冒者方沉溺於聲色貨利中欲其清淨
寡欲棄萬守一曷可得哉藝成而下信爲有之倘亦
逾於無聞者乎君子是以亦有取乎此也

漢

劉惇字子仁平原人也遭亂避地客遊廬陵事孫輔以

明天官達占數顯於南土每有水旱寇賊皆先時處期無不中者輔異焉以爲軍師軍中咸敬事之號曰神明建安中孫權在豫章時有星變以問惇惇曰災在丹陽權曰何如曰客勝主人到某日當得問是時邊鴻作亂卒如惇言惇於諸術皆善尤明太乙皆能推演其事窮盡要妙著書百餘篇名儒刁玄稱以爲奇惇亦寶愛其術不以告人故世莫得而明也

三國吳志

仙師姓楊氏漢太尉三世孫諱善字純仁其先華陰人震五子長曰牧次曰里里生馥馥生善是爲仙師母戴氏性簡靜樂清虛晝寢夢一仙官跨鶴升其庭紫雲暎體已而有孕誕彌之夕異香藹然踰月不歇少長着字掀豁髭髯修美善誦老子經不友凡俗端居默坐喟然歎曰世間萬事電火風燈不足深戀吾將策倒景以追喬松游靈獻祚微海內大亂偕母避地江南家於廬陵北塘之齋坑隱居求志而母先仙化因葬焉其處無螺蚩蛙蚊象皆歎異仙師哀慕不已忽一日有老父過門鹿冠鶴鬣談吐絕俗詢其姓名

俱不以告良义告師曰子神清骨竒名登金簡當度世侍列帝廷宜自保愛更十年與汝再會揖而出已而失之由是歷涉阜山覬其所遇至城西北隅朝元嶺黃金臺題云落落萬古名悠悠千載心人間不相遇白雲深處尋朝夕精思志相感激如期老父果至握手告曰與子別後抑有得乎仙師未及對老父謂曰道以清淨爲本元默爲宗子今同符然非輔世澤民充備功行則不能昇遊帝鄉因授玉皇心經三官雷樞玉經賜童子秘要法鏡白角一枝囑曰子誠感高聖求道惟切今授子仙任於吳越實司雨澤證道於震山之陽其勉之未幾旱魃害稼竭澗枯疇四方袂香趨問無虛日仙師惻然徇情登五岡峰畫地作壇拍牌鳴角開乾破巽走檄飛符鞭靈醮叱屏翳有頃雲師溢空雨騎合陣天鼓轟震鏡電燿耀甘澍如傾年以上熟人皆德而神之三國吳時仙師遊覽郡境觀蒼龍之墟一山聳秀上倚層霄景象秀異就而視之山靈告曰是山爲吉陽福地觀君儀狀穎拔德望昭揭天人所欽蓋立精廬於此以福是邦仙師憶

老父之言曰而屬遐舉之辰悉召鄉里耆老叙別吾受金闕詔令領職雷師仙凡路殊無由再會昔傳神角今留世間此去運厄亢賜饑饉薦至元元被殃若能精禱於吾當沛甘澤以甦下土湏臾彩雲下迎從官畢集仙師揖謝高冲荏苒而沒爾間後歲不雨如仙師遺言隨叩隨應角一顯現信知其為神物鄉人思之共為立祠乃相與言吾師道隆千古澤被後世慈心濟物如響斯答雖聯仙府而名號弗著於民將何所稱焉因共諡為慈濟仙師云

陶宏景隱居集

按名勝志載楊善晉時人雲遊至廬陵東山真常觀適歲旱於東城植竹為壇以禱雨大澍遂於山下結廬居焉道成蛻化今懸崖石上有迹可徵而王志言善於五岡峰飛舉俱與本傳各有異同附識於此以備參考

隋

四祖道信大師姓司馬氏隋大業十三載領徒至吉州值羣盜圍城七旬不解萬眾惶怖師愍之教令念摩訶般若經時賊望雉堞間若有神兵乃相謂曰城內

必有異人不可攻矣稍稍引去

景德傳燈錄

唐

脩山禪師唐大成間結廬於東山之絕塵處曠歲彌年
人跡罕至惟樵夫深入時見師坐松下輒有羣鳥啣
菓爭集師一一取食之食訖飛去樵夫以語人好事
者相率訪之師方鼾睡扑握暖足伊尼衞床衆異之
競爲除地集林建大蘭若興工之始誠諸匠曰汝等
必止葷酒山神利害不可犯匠皆曰諾月餘一匠思
肉食下山數日復來忽兩虎踰垣立匠前左右視作
哮吼聲其人驚怖師曰必汝犯戒首實爲宜匠解腰
間布囊付師曰適過市買牛肉一塊耳師曰然矣因
截肉作二段餵虎曰且去言訖虎隱人愈敬之由是
金帛之施雲集棟宇莊嚴不日而就嘗設法登座堂
下湧出五井皆滿貯米油鹽麩菜取以飯衆不少不
餘師曰此五方龍王獻供以濟匱乏可名此曰龍濟
寺今四井已涸一井尚存

舊志

南唐

玄寂禪師爲龍華寺開山之祖道行高妙宋開寶二年

南唐中書侍郎先政殿學士韓熙載撰其塔碑文曰
昔婆伽婆以清淨妙心付迦葉波迦葉而下以心傳
心二十八傳聯珠印度一花五葉香散支那降及曹
溪得法者衆然則以一念攝於多法以一塵統於沙
界此念此塵彼界彼法二俱不有空亦非斷明是法
者於大悲海運普濟舟開無相門演不二法化有情
於一旨獲當果於上乘是之謂大善知識者玄寂禪
師其人也師名隱微豫章新淦人也夫其珠生媚澤
玉蘊良山留潤入纏必歸族姓故有楊氏之託焉異
人之生顯著竒應既藐流俗亦表厭靈故有光明鑒
室之祥焉軒冕爲累身之資鼎鐘乃爽口之具孔翠
彬蔚網罟隨之鴻鶴清素霄漢自得故有棄俗之誓
焉開無師智歸不二門夫爲世家則有師訓七歲詣
本邑石頭院道堅禪師爲弟子二十依洪州開元寺
智稱律師受具戒既還而歎曰沙門者達本識心之
謂也且戒慧之學未足明心寂滅之宗方爲了義青
山有路白雲無心我之時行豈復他日遂徧尋名嶽
歷抵禪林順義中卷衣南行遐趨五嶺羅山法寶大

師巖頭真子德嶺桂孫智鏡當臺共仰不疲之鑿鴻
鐘在簾咸聆應扣之音師既解橐雲堂端襟下榻玉
處石而光華尚隱虎在山而清嘯難藏扣我機緣日
知時節先是羅山有師子在窟出窟之句海內風傳
一日法座高登海徒雲萃師遽前而禮竣發問端羅
山道眼素明偉師峭崿抗聲酬詰衆莫之知俄於敬
諾之間豁然大悟自是朝昏隨衆語默全真放曠四
儀盤桓數稔異日羅山以師大緣將至苦諷還御太
和中杖策離羣擔簋度嶺漸迴江介徐次龍泉邑宰
李孟俊一覩道婆深加凝注邑有十善蘭若經廢時
多願言葺興強師駐錫冀揚大法用福蒸民師具順
隨之心盡檀那之請玄徒輻輳淨供山儲應接隨宜
了無滯礙有問如何是十善橋云險過者如何喪叅
乎祖道一以貫之問而數窮答有餘力達深得妙斯
之謂歟時先朝端拱萬機穆清大寶遠懷道德思結
深因寶大九年始自龍泉詔歸鳳闕命住龍光梵剎
賜號覺寂禪師高闡一音將逾數歲改賜奉先禪院
用邇皇居辛酉歲春將有事於省方利建邦於洪井

千乘萬騎咸從於和鑿竒士高人必先於行在師首
預清列簡自宸衷既抵新都復住大寧禪院誨人無
數學者有歸迨於禹成之期難預因山之會言念三
世諸佛皆入涅槃吾獨何人自甘遲暮其歲十月見
病者相卧方丈中是月二十七日剃髮浴身入堂別
衆勤宣祖意勦最後流語訖安然形留氣盡俗壽七
十六僧臘五十六諡玄寂禪師塔名常寂歲在壬戌
二月六日歸葬於吉州吉水縣仁壽鄉太平里之原
遵遺誡也今元帥鄭王備嘗道味時任保釐巨捨信
財俾營塔廟惟師夙弘妙願應生像年道峻德充名
符實備貌孤神王語淡氣幽情高而月冷秋空格峭
而雲生碧嶠以慈音而演法用實智以化人故得道
契王臣心歸緇素俄昏慧炬永絕微言瞻道貌以長
垂覽清微而徒在龍泉廣福十善禪院嗣法弟子契
任肯常相續住持小師自明自滿七十三人懼歲時
之浸遠恐陵谷之貿遷願紀金碑以旌玄壤其辭曰
三界茫茫兮四生蠢爾背覺合塵兮死此生彼有鑠
開士兮乘悲應世端坐寶床兮片言析理道價既高

兮迴心天子宗風又翦兮伏膺多士遠近瞻渴雲忽
起覺日云沉兮法幢遂靡傳心羅山兮訓徒帝里韜
真豫章兮歸與吉水金骨藏山兮德音無已寶塔鎮
地兮來者斯企 同上

宋

李思廣字景淵吉水人放意山水間得錢即以易酒或
醉卧市中政和四年往螺川常止習溪橋有酒姬頗
異之每飲不問其直乂益不替一日忽謂姬曰我將
往當別得奉書報謝晨起視則已死體發熱如生召
所親葬之後有自衡岳來者爲景淵致書謝姬郡少
年發其塚獨有空棺 府志

文悟泰和人姓劉氏自幼不茹葷比長爲念佛善友時
青原信道風鼎盛因落髮師事之暨信順寂徧歷禪
會復還青原住吉水南岡明教典通儒書住六年去
之巘山得源菴坐定良久乃索紙筆書四頌以辭水
豐吉水泰和三邑道友時紹興四年聞維得舍利極
多舌根與齒不壞叩之作銅鐵聲熟視耿耿有光其
徒塲而藏之有語錄二卷 同上

袁道者般若禪師弟子隨般若學道築室於縣之東山旁般若坐寂後道者亦即隱化至今名其所居之山

為袁道巖

舊志

張惟深為道士嘗從楊誠齋學詩里人周平園贈以詩云出世須拋世俗文休論何遜與陰鏗但求仙伯三年艾會向彌明頂上行

周文忠詩集

劉惠卿以善醫名楊誠齋贈之詩有活却千人藥一囊陰功吹作滿城香之句

省志

朱元炳字斗南號月窓文昌鄉人起田間談星命高妙精絕盡奄同袍試以百十命應對如流而人品之大概皆不爽問其所得何書則嘗汗漫於數十家而會歸於李吉甫林開之說吉甫之書人多有之以其深而不能詰若林開則人未有得其本者也元炳會二為一而又以所得於數十家者間出而證之斯其所以獨步也

文文山集

明

冲虛子姓饒名正道字中文江人也生有奇相有道士見而異之曰是子非塵垢中人語其父母攜入崇

道觀授以金丹秘要能運精氣書符篆驅役雷霆水旱疾癘人有求之者其應如響工爲七字句詩往往有奇語洪武間徵爲太常樂舞生會夏久不雨有以冲虛子言之高廟者即日命建壇神樂觀冲虛子凝神默坐期以三日必雨及期日色如赭無纖毫翳衆咸駭愕俄有雲勃然從東方興雲際閃閃見旌旗狀上隱隱有青雲二大字衆復大駭已而雲陰四合雷殷殷作聲風冷然而起頃臾大風雷電交作雨下如注永樂九年授北京祠祭奉祠於皇太子命修醮於

白雲觀凡七晝夜皆有異徵皇太子賜號冲虛作冲

虛菴記予之人稱之曰冲虛子云

胡文穆集

劉允中宋名醫劉河間後也宋末遷於吉水元至元中

允中爲本州醫學教授壬辰之亂遇賊於鄉刃將及項有數人大呼而前曰是真善人勿殺也以是得免明初愈以醫顯所治疾無不愈者或迎而不獲親戚至相怨尤以爲劉師來病或可治章江之濱諸郡人皆敬信之車騎絡繹於門而允中退然若不自勝於孤貧者尤加意撫恤家傳河間秘書嘗借與人觀世

所罕觀物也允中能推行之故能成其名允中死妻李氏習其法亦以醫聞

解春雨集

性空居士者姓羅名熙明吉水人少爲蜀商遊峨嵋悅之且喜學浮圖術年六十餘喪父母絕葷酒棄家潛姓名入重慶真武山中子通挾厚貲物色之居士故逆知人事一日謂其徒曰明且有遠人來善視之比曉通至相見號泣請還不答頭觸地流血被面如是者三日不輟居士神色不動徐慰之曰汝第歸某月日汝已得子所挾物慎無留此作祟也通誓死不去則取諸徒所畫已像自書偈曰娘生本來無有相又勞丹青強畫樣改名換姓異多端古今湛寂空蕩蕩噴對面分明人不識精赤條條無遮障指謂通曰吾非汝父此爲汝父能生活汝者謹奉持以行遂絕口通不得已長號返舟經王陵灘風濤倏起同侶盡溺忽憶居士語抱軸浮水面得免至家子秀章生訊月日俱驗後居士年九十有二召山人周良授書二編且曰某日吾歸此編將以相報其一俟吾孫秀章來與之至期沐浴端坐逝七日面如生郡守異其事捐

俸葬之秀章所得書乃居士語錄其授良者秘不示人咸疑異書云

府志

南浦禪師龍華寺僧弘治間三奉勅書榮構鴻偉示寂之後遣官御祭衆僧勒其文於石曰維大明天順八年歲在甲申五月癸丑朔二十二日甲戌皇帝遣禮部右侍郎李紹賜祭僧錄司右善世兼廣善戒壇圓授宗師南浦曰爾早通釋典名著縉流自應召以來京每竭誠而報國精勤之行愈久不渝寂淨之心老而彌篤是宜表崇梵教以振宗風胡不百齡遠茲圓寂特昭卹典諭祭爾靈靈其如存尚克歆享

舊志

妙湛僧不知何許人明弘治間遊東山時值日夕四顧榛莽樵子告以虎穴僧曰使吾佛法復興虎當避不爾吾即非佛虎食我遂跣趺草上明旦樵子往僧始出定邑中諸大姓轉相驚告廣施金帛助壇場虎於此遠徙焉

羅念菴集

天真僧比畿人首叅五臺孤月又叅妙高峯更名明果行止有儒者風應羅文恭召住持石屋菴遂爲石蓮洞羣僧之祖

石蓮洞志

周大赤字畫人博洽經史百家後從煦杲照禪師披雜

於石蓮洞

王志

孫允賢李南翁俱吉水人明中葉間以善醫名於時

府志

國朝

羅暘明給事中大絃孫也爲國學生得異人授能知三
生果非有道者不與言巡撫董衛國嘗賓禮之世稱
爲羅神仙云

王志羅邦儲傳後

邱墓

昔孔子題季札之碑史公訪許由之冢趙文子與叔
譽觀乎九原而論隨武子之賢則善其生者所以善
其死也不然鸞車象人閉不復見天祿辟邪草樹已
平生則漢室表鄭公之鄉沒無唐世嚴樵蕪之禁保
無有顛倒衣裳奪於衛靈者歟夫賢者之懿德芳烈
載在人間封殖所存甘棠猶思勿敗况體魄之降冠
履所藏其焄蒿悽愴有不曠百世而相感弔望諸而
墮淚者耶然則冢人墓大夫之職今雖不能據復乎
古而省其梅鴉登之楮筆庶晏嬰之墓逼處城隅櫟

里之邱夾兩宮室有不必詢諸曼父之母者豈似于

欽之修齊志必待感趙岐之夢而始載及於孫嵩也

夫

漢長沙王墓 詳古蹟

隋李孝子墓 在學宮西 詳古蹟

唐吉州刺史彭玕墓 在折桂鄉二十九都楓口 傑原雍正八年重修

後唐檢校太保彭彥昭墓 在折桂鄉三十一都明善里 小蛇原乾隆九年夏邑裔孫

江西布政使家屏率族人重修立石又彥昭十一世孫明處士聖思葬文昌鄉三十七都綠富坑十二世孫均寶十三世孫德盛葬文昌鄉三十七都竹小塘俱乾隆十一年裔孫家屏重修立石

南唐吉州刺史楊輅墓 在同水鄉六十二都鵬嶺 西洞坑揚士奇撰碑文

南唐侍御史蕭儼墓 在文昌鄉四十都御史山

宋贈尚書侍御蕭定基墓 在同水鄉五十都故舍之原

宋中奉大夫楊存墓 在五十六都 澁塘大夫山

宋贈太師楊萬里墓 在同水鄉五十都蓮花形

宋文學王子俊墓 在白沙山背

宋大理胡夢昱墓 在天獄山 白茅坑

元叅謀蕭彞翁墓 在府儒學右讀書臺下天啟三年族 人重修乾隆十一年廬陵縣令錢界

再修立石 以紀其事

明延平知府胡子祺墓在五十二都白竹塘

明尚書周肅墓

明大學士解縉墓舊葬仁壽鄉一都瀾溪嘉靖四十年知縣羅黃裳改葬東門外半里許東

山亭

明大學士胡廣墓在天獄山下永樂十六年勅葬前有享堂少師楊士奇撰文

明邑令武進錢本中墓在昭慶寺

明贈侍郎周遺安墓在仁壽鄉三都雙崖宣德七年勅葬

明尚書周忱墓在廬陵縣山前

明侍郎羅汝敬墓在同水鄉六十一都桃林

明都御史熊檠墓在縣東鳳凰山宣德十一年勅葬前有享堂鳳凰橋江畔有神道碑一座

少師楊榮撰文

明侍郎錢習禮墓在文昌鄉圓塘

明尚書廖莊墓在二十一都鳳形

明少保羅通墓在廬陵縣石鼓塘

明邑令昆明李智墓在仁壽鄉二都醪橋

明學士劉儼墓在文昌鄉夏朗

明侍講彭教墓在文昌鄉龍岡

明進士劉觀墓在鑑湖畔

明方伯彭杰墓 在大山之陽

明都御史張綱墓 在廬陵縣坊廓鄉

明都御史李中墓 在同江赤石潭管家坑上天穴

明太僕卿曾直墓 在六十二都龍陽同

明贈太保尚書周延墓 在同江赤石潭

明贊善羅洪先墓 在同江赤石潭

明尚書毛伯温墓 在郡城北真君山

明尚書曾同亨墓 在六十二都符山下勅塋

明左都御史鄒元標墓 在中鶴鄉白沙

明祭酒劉應秋墓 在仁壽鄉東槎灘

明贈尚書刑部郎李廷諫墓 在仁壽鄉五都松林塘崇禎十四年勅塋

明給事中羅大紘墓 在同水鄉六十都鶴鶴洞

明尚書李邦華墓 在仁壽鄉六都鰲山勅葬湖西道彭期生督造

明尚書李日宣墓 在文昌鄉漆塘瀧城

明殿撰劉同升墓 在文昌鄉夏朗

國朝贈尚書兵部侍郎李元鼎墓 在仁壽鄉三都鶴藪

國朝尚書李振裕墓 在峽江縣蔣沙

災異

休咎祲祥異氣時至相爲乘除其事非屬常有其數本不可知而前人皆以爲與人事相感應歸之自修以爲懲創於是爲之禴禱祈禳既至而爲之拯救未至而爲之隄防則雖罹患不爲大災故修人事以應天心凡其不可知者皆其預籌者也吉水城夾恩顛二江從來多水患今採其明切者載之使知所鑒以爲備毋或以其不可知非常有也而忽諸

晉

永興元年石陽地震水湧山崩

省志

太興元年十二月廬陵地震水湧出山崩

晉書五行志

太元八年三月廬陵大水平地五丈

同上

十八年六月己亥廬陵大水深五丈

同上

義熙八年自正月至四月廬陵地四震

同上

齊

建元二年夏廬陵石陽縣長溪水衝擊山麓崩長六七

丈下得柱千餘口皆十圍長者一丈短者八九尺頭

題有古文字不可識江淹以問王儉儉云江東不閑

隸書此秦漢時柱也

齊書五行志

唐

顯慶元年九月戊辰吉州火焚倉廩甲仗民居二百餘

家

唐書五行志

宋

咸淳四年五月十四日文江大水

文文山集

元

泰定元年吉安路屬縣皆水民飢賑釋有差

元史

至元四年五月吉安恩江大水

同上

明

成化二十一年夏四月江西大水自虔達洪衝冒城郭

濱江郡邑公私廨宇頽毀殆盡吉水縣廟學尤甚

顧

景昌修學記

嘉靖十四年五月十五日文江城頭水高十丈

羅念菴

乙未大水詩

國朝

康熙十一年天獄山有虎大為民患知縣王雅檄於城

隍越數日其虎自投山穴而死

王志山川註

四十四年夏五月吉水大水巡撫卽廷極勘報蠲賑

省

五十二年夏五月贛江水溢吉邑公私廨宇多被淹沒

縣署卷宗儒學書籍及各祠神主皆漂失無存

原案

雍正十一年夏五月恩江大水折桂鄉丁江漁梁等村

落俱被冲沒水至蓮花石勢如建錡傷人畜甚衆巡

撫謝旻勸報蠲賑有差

原案

雜祀

聞之民不祀非類爰居見譏其來舊矣然楚人尚鬼秦漢已然唐宋而還所以飾廟貌而傷民財者雖有

誥戒誰其信諸顧士大夫罷政還家往往崇飾寺觀以為遊憇之所而况農桑販易之區叢祠村社擊土鼓而事巫覡又奚怪乎吉邑之廟宇寺觀有創自唐宋而建於詔旨者今雖不盡存要亦一時之風尚所係不得而盡泯也舊志所紀於寺觀臚列甚備今俱仍而不削而取祠廟之非令典者附益於此概曰雜祀夫陳寶之祠蹠氏之觀見傳於史氏比而觀之或亦君子之所不廢也歟

寺

龍華寺

在縣南坊南唐保大間勅建名龍光寺九年玄寂禪師奉詔住持宋理宗賜御書覺皇寶殿額明正統間南浦禪師復奉勅建易名龍華崇禎戊辰亥宗和尚重修癸未功圓即遭兵燹國朝康熙辛亥梅逢禪師重修統院九寺內有玄寂禪師塔

太雲寺

在北坊一名帶雲唐朝建以惠公禪師往來於東山般若庵若庵常帶雲霧故名

盤龍寺

在東門外唐寶歷二年開山祖師竺山建國朝康熙壬子上乘和尚重造

東湖寺

原在學前徙東門外傅家橋上今圮

南岡寺

在邑東山即古孝義寺唐寶歷三年性空大師來自丹霞結茅於此太和遂成叢席宋紹聖中黃山谷延青原惟信禪師開化至政和時道譽日隆張商英言於朝勅賜為崇義禪寺南宋後師能禪師住持未幾易於南岡以崇義名山元皇慶泰定間靈珠禪師繼振宗風明末燬於兵燹國朝順治

間獨立禪師興復如舊有劉須溪書額至今猶存統院六

龍濟寺

在東山詳古蹟

歸福寺

在六十都唐朝古刹明末傾圮在六十都西舒先禪師重建

南禪寺

在六十一都同江南里許宋時古刹也明李谷講學於此正德已卯間王文成從虔赴閩會勸兵變舟過同江時谷平家居文成邀與俱行辭不往及文成至豐城聞宸濠之變易小艇亟返同江微服步行至谷平家與俱至南禪信宿畫策入吉安起兵討賊

明末寺燬於兵國朝順治中住僧幻影募貲重修

周嶺寺

一作洲嶺洪武間僧寶師重創其徒已菴繼承歸至今菴於山厥後已菴之徒俊極常應詔赴京師受勅書以邑人周叙有記

青螺寺

解空寺

在都一

龍坪寺

在都二

仙槎寺

在都三

巖真寺

統院五都

漕涼禪寺

在都山

正覺寺

在都四

東林寺

在都八

金沙寺

在都九

吉祥寺

統院十一都

羅溪寺

在都八

重興寺

在都八

寶城寺

在都八

白竹寺

在都九

廣寧寺

在都七

長慶寺

在都三

前山寺

在都二

後山寺

在都五

延福寺

在都一

資福寺

統院六

雲慶寺

統院二

龍水寺

昭慶寺

巖山寺

臨津寺

在都五

延壽寺

禪居寺

在都石蓮洞後

彌陀寺

在都九

悟空寺

在都六十二額文信國題

院

上茶院

源陂院

草子院

竹坪院

俱在都二

東山院

在都三

觀音院

寶興院 俱在四都

南華院 在六都

巖峰院 在九都

龍仙院

山寺院

南隱院 俱在二都

龍果院 在二都

建峯院

興福院 俱在二都

龍池院

廬山院 統院十五

正覺院 俱在二都

棹源院

水陸院

梵惠院 俱在二都

六祖院 在二都

明覺院

般若院

西菴院 俱在二都

三峯院 在二都

長興院 在二都

龍安院 在三都

增福院

龍禪院 俱在三都

合龍院 在三都

寶積院 一作寶錫歐陽文忠修有詩見藝文

國興院 俱在三都

饒益院

降魔院

靈巖院 俱在三都

安溪院 在三都

黃沙院 在三都

仙靈院

延興院 在四都

龍泉院

招賢院 在四都

金城院 在四都

羅溪院 在五都

東臺院

龍城院 俱在四都

龍堂院

麻源院 俱在四都

廣濟院

靈峰院 俱在四都

大樂院

崇福院 俱在五都

清溪院 在五都

寶壽院

松林院 在五都

長壽院 在三都

新慶院 在五都

延慶院

雲際院 在五都

雲水院

福壽院 在五都統院七

禪寂院 在五都

皈福院 在六都

文昌院 一名文昌閣 在六十一都

仙居院 在六十二都舊傳宋時呂純陽嘗宿此故名

禪悅院 在六十二都劉文襄為雲居顓愚和尚建

回曾閣院 在六十二都

卷

金粟菴 在小東門內

華巖菴 在北城內

鐵佛菴 在小東門外鄒忠介元標建

法雲菴 在北門外

好生菴 在太平山下今地

韋菴 在太平山下曾和卿建今地

南源菴

在東山

西源菴

在東山

六吉菴

在株山橋上知縣孫之益建今廢

紹隆菴

在四都侍郎李元昂有募修疏

濟渡菴

探花徐穆有記

極樂菴

般若菴

在東山般若禪師書其中為作記

杲禪師居此

開法於此羅文恭洪先曾讚二載衆至千人

孚慧菴

在八都

萬松菴

在二都

慈雲菴

雲龍菴

慶源菴

紫巖菴

有丈六鐵佛在紫原峽中

普度菴

在二十都

寶明菴

在四十都

清溪菴

在五十都

安遠菴

勝龍菴

在墨潭今廢

萬福菴

在五十都

道和菴

孚菴

在五十都

靖明菴

在六十都

錫菴

在同水谷村孝友李士開祀此族子李鶴鳴記墨歷和尚書額

鹿苑菴

在同水谷村李鹿南憲副墓祀於此有南樓扁額係鄭忠介元標手書

吉祥菴

在六十都

福緣山菴

在六十都

盤龍菴

在同水谷村

鯉魚菴

在六十都

蓮社菴

一名保禦亭在六十一都

聚龍菴

一名聚龍山在六十一都

錦鱗菴

在瀧洲殿元劉同升建

淨名菴 在六十二都劉孟欽兄弟建為藏神宗勅賜書

小祇園菴 在六十二都 青基菴

觀

崇道觀 在城北吳赤烏間嘗有一人攜瓢笠來遊一日以笠覆瓢而去吳主賜額招仙宋改今額明永

樂間重修胡文穆廣為之記

崇元觀 在城北五十里晉許旌陽治蛟於此冶鐵鎮之今呼為玄壇觀呂洞賓有詩

朱陵觀 在縣南八十里隋名洞巖唐賜今額 冲虛觀 在二十

南華觀 在二十 玉真觀 趙與慶劉敬伯有詩

太初觀 在縣北 紫極觀 在二十

延昌觀 紫府觀

太和觀 真元觀

石華觀

集虛觀 在縣北六十里舊傳楊仙師於此冲舉永樂初重建

玉華觀 在南嶺劉周楊三姓山

延祐觀 在同水谷村里人李槩割地創建因祠祀馬

玉虛觀 在同水谷村羅文恭洪先嘗與諸賢講學於此

扶松觀 在西

廟

東坊廟舊在大東門外今移東門內祀宋都部署康保齋契丹入寇保齋戰死於高陽關後人因廟祀

之加封
至王爵

南坊廟舊在龍華寺左今遷入城南祀宋都部署康王保齋

西坊廟舊在西門口祀吉陽廖侯謙宋時大水漂木一段有侯名坊人塑像立廟祀之今移建於西街

北坊廟舊在北門外太初觀右後遷入北坊大街祀唐郭汾陽王子儀

小東坊廟在學宮左東嶽廟在儒學西

普德廟在縣東北一里右有靈泉剛應廟詳古蹟

仰山廟在縣東二里鹽倉嶺槐市靈祐廟蕭伯與有詩

仙師廟在中鵠鄉五岡峯仙師姓楊廟中有所遺白角每早禱吹之則雷雨隨作

顯祐廟在中鵠鄉神姓劉名煥長沙定王之裔清大業間建宋元祐間賜額孚應又封其神曰順惠侯

高駢廟在縣東騰波唐懿宗乾符五年黃巢兵陷虔吉鎮海節度使高駢破之民賴以安遂立廟祀焉

瀟瀟廟在縣南義倉江側瀧之上有大石破甕側立千仞蓋蛟龍之窟宅歲旱禱兩寺多赴馬宋王

廷珪有記康熙壬子太守郭景昌知縣王雅鼎建

朱陵廟

仙壇

東山仙壇

白鶴仙壇俱在

北華仙壇

南華仙壇丁子聖

浮邱王郭仙壇在中華山

雷壇在三都臨大江

吉水縣志

卷四十一

外志 雜祀 三十二

紫華壇

在五都

大武壇

在五都

金華仙壇

中華仙壇

俱在五都

萬華仙壇

在六十都

茅姑仙壇

天玉仙壇

吉水縣志卷四十一

吉水縣知縣關中米嘉績纂修

外志二

雜紀

雜紀者蓋古說家者流其源出於稗官王者欲知閭巷風俗故立稗官使稱說之世所傳論衡新語諸書大率皆然昔韓嬰說詩有內外傳今所傳者外傳而已外傳非詩本義然所以能傳於世以其新入聽聞足供世談噱而君子於義或不之先然小道必有可

觀昔賢已云况雜紀為紀載之書非徒滋口談者漢魏以來為此類者不啻千百種其間字句紀載之法亦各有體是以能者垂名於後世今所編輯雜出於諸家文雖不一致要必擇其可徵者始載焉或前賢之逸事或時人一節之長不可以特書而又容以廢置者班孟堅云閭里小知者之所及亦使綴而不忘是亦先王設立裨官之遺意也夫

廬陵郡有董氏之宅前有董家祠昔有董氏語其鄉人曰吾當畫室作神及死家人老幼皆卒鄉人往往見之稱吾於地下作廬陵侯鄉人因為立祠能致風雨任昉述異記

漢末丹陽僮芝自擅廬陵詐言被詔書為太守

江表傳

吳主權潘夫人者會稽人幼與姊俱輸織室權見而幸之生子亮及亮立為太子乃請嫁夫人姊與廬陵譚紹亮即位遂拜紹騎都尉授以兵亮廢紹與其妻還本郡廬陵

吳志妃嬪傳

廬陵有木客鳥大如鵲千百為群不與眾鳥相厠俗云是古之木客花所化廬陵即今吉州也

太平御覽

羊聃字彭祖少不經學時論皆鄙其凡庸先是兗州有
八伯之號其後更有四伯大鴻臚陳留江泉以能食
為穀伯豫章太守史疇以大肥為笨伯散騎郎高平
張嶷以狡妄為猾伯而聃以狼戾為瑣伯蓋擬古之
四凶聃初辟元帝丞相府累遷廬陵太守剛克羸暴
恃國威縱恣尤甚睚眦之嫌輒加刑殺疑郡人簡良
等為賊殺二百餘人誅及嬰孩所髡鑠復百餘庾亮
執之歸於京都有司奏聃罪當死以景獻皇后是其
祖姑應入議成帝詔曰此事古今所無何入議之有

猶未忍肆之市朝其賜命獄所琅邪太妃山氏聃之
甥也入殿叩頭請命王導又啟聃罪不容恕宜極重
法山太妃憂戚成疾陛下罔極之恩宜榮生全之宥
於是詔下除名頃之聃遇疾恒見簡良等為祟旬日
而死 晉書列傳

孟嘉少知名太尉庾亮領江州辟為廬陵從事嘉還都
亮引問風俗得失對曰還傳當問吏亮舉麈尾掩口
而笑謂弟翼曰孟嘉故是盛德人 同上

恭帝諱德文安帝時封琅邪王桓元篡位改為石陽縣

公與安帝俱居尋陽元死復為琅邪王安帝崩羣臣
奉王即帝位

晉書本紀

周朗汝南安成人也為廬陵內史郡後荒蕪頗有野獸
母薛氏欲見獵朗乃合圍縱火令母觀之火逸燒郡
廨朗悉以秩米起屋償所燒之限稱疾去官遂為州
司所糾還都謝世祖曰州司舉臣愆失多有不允臣
在郡虎三食人蟲鼠犯稼以此二事上負陛下上變
色曰州司不允或可有之蟲虎之災寧闕卿小物朗
尋丁母艱有孝性每哭必慟其餘頗不依居喪常節

宋書列傳

劉守貞善調風角揚州刺史楊行密遣將周本圖吉州
與刺史彭玕戰於象牙潭玕敗走立寨新淦楓岡聞
守貞名召至軍中每逆戰守貞以術厭之敵不能破
一夕劉死玕戰不利棄寨去

江南野史

宋彭齊有盛名王珽珪曰彭太博以文章擅名海內一
時名公卿仰慕之其醉墨戲語時見野史風味可概
見也

省志

宋仁宗景祐元年甲戌王曾為相士類翁集放進士榜

得張唐卿以下三百餘人而吉水流坑一門五董世

艷其榮

解縉山原羅氏譜序

歐陽公初以范文正事得罪於呂相夷簡遠貶三峽流落累年後為文正作神道碑盛稱呂能釋私憾用希文而共力於國家純仁刻石削去此一節云我公至死未嘗解仇公歎曰我亦得罪於呂相者惟其言公取信於後世耳吾聞文公自言平生無怨惡於一人其與呂解仇書見在范集中豈有父自言無怨惡於人而其子不使解仇於地下父子之性相遠如此公

知潁州時呂子公著為通判公見其賢及還朝力薦

之古今長者錄

朱弁曲洧舊聞云歐陽公歸田錄初成未出而序先傳神宗見之遽命宣取時公已歸潁川以其間紀述有未欲廣播者因刪去之又惡其太少則雜記戲笑不急之事以充滿其卷帙既繕寫進入舊本亦不欲存今世所有皆進本而原書蓋未嘗出其子孫猶謹守之得樹樓雜抄

歐陽公與王禹玉范忠文同在禁林故事進春帖子自

皇后貴妃以下諸閣皆有是時溫成薨未久詞臣闕而不進仁宗語近侍曰詞臣觀望溫成獨無有色甚不擇諸公聞之皇駭禹王忠文倉卒作不成公徐云某有一首但寫進本時偶忘之爾乃取小紅箋自錄其詩云忽聞江上有仙山烟鎖樓臺日月閑花下玉容長不老只應春色勝人間既進上大喜禹王拊公背曰君文章真是含香丸子也

吳曾能改齋漫錄

歐陽文忠公晚年常日竄定平生所為文用思甚苦其夫人止之曰何自苦如此尚畏先生嗔耶公笑曰不畏先生嗔却怕後生笑

沙溪遺事

文章各有體六一公為一代冠冕亦以其事事合體如作詩即幾及李杜碑銘記叙即不減韓退之作五代史即與司馬子長並駕作四六一洗崑體作奏議庶幾陸宣公遊戲小詞亦無媿唐人花間集蓋得文章之全者如東坡之文固不可及詩如武庫矛戟已不無利鈍且未嘗作史曾子固之古雅蘓老泉之雄健固文章之傑然皆短於詩山谷詩騷妙於天下而散文頗覺繁碎

國憲家猷

歐陽文忠公嘗語余曰少時有僧相我耳白於面名動天下唇不著齒無事得謗其言頗驗耳白於面則衆所共見唇不著齒余不敢問公不知其何如也

蘇文

忠公集

治平中有吉水令治邑巖酷有野客馬道為啄木詩諷之曰翠翎迎日動紅嘴響烟蘿不顧泥丸及惟貪得食多纔離枯朽木又上最高柯吳楚園林澗忙忙爭柰何令見其詩稍緩刑時人目曰馬啄木

墨客揮犀

元豐八年吉水楊存宿息州旅舍覺床席間有物礙其

背揭而視之乃鹽鈔二萬引明日詢主人曰前日何人宿此曰淮甸有巨商某姓名也存曰此吾故人設其人回可與之語吾在某坊某家安歇又大書於所宿之房曰某年月日廬陵楊存宿此遂行不數日商人物色之至息邸主以存言告且指壁書示之乃赴京訪存存審實即以還之商人分數百緡就寺為存祈福是年登第官至中奉大夫子孫皆貴顯

府志

尹躬字商老宣和三年進士廉介不苟阿官江西憲屬時決獄至吉水有繫遺賦千衆男女共貫一索聞躬

言九鼎志 卷四十一
至密置他偏守躬廉知盡令開釋之後官終正郎永
新縣志

楊誠齋為零陵丞以弟子禮謁張魏公時公以遷謫故
杜門謝客南軒為之介紹數月乃得見因跪請教公
曰元符貴人腰金紆紫者何限惟鄒至完陳瑩中姓
名與日月爭光誠齋得此語終身厲清直之操晚年
退休悵然曰吾平生志在批鱗請劍以忠鯁南遷幸
遇時平主聖老矣不復遂所願矣立朝時論諫挺挺
如乞用張浚配享言朱熹不當與唐仲友同罷論儲
君監國皆天下大事高宗嘗曰楊萬里直不中律孝
宗亦曰楊萬里有性氣故其自贊云禹曰也有性氣
舜云直不中律自有二聖玉音不用千秋史筆

羅大經鶴林玉露

尤梁溪延之博洽工文與楊誠齋為金石交淳熙中誠
齋為秘書監延之為太常卿又同為青宮寮案無日
不相從二公皆善詭延之嘗曰有一經句請秘監對
曰楊氏為我誠齋應曰尤物移人眾皆歎其敏確誠
齋戲呼延之為蝻蚌延之戲呼誠齋為羊一日食羊

白腸延之曰秘監錦心繡腸亦為人所食乎誠齋笑吟曰有腸可食何須恨猶勝無腸可食人蓋蝻蚘無腸也一座大笑厥後閒居書問往來延之則曰羔兒無恙誠齋則曰彭越安在誠齋寄詩云文戈却日玉無價寶氣蝻胸金欲流亦以蝻蚘戲之也延之先卒誠齋哭之哀自作祭文云齊歌楚些萬象為挫瓌偉詭譎我倡公和放浪諧謔尚友方朔巧發捷出公嘲我醉

同上

周文忠公有魚兒牡丹詩序云得之湘中花紅而蓋白

狀類鱧魚纍纍相比枝不能勝壓而下垂若俛首然鼻目良可辨葉與牡丹無異亦以二月開因是得名

其幹則芍藥也子名花而賦是詩聞江東山谷間此品甚多詩云天教姚魏主芳菲合有宮嬪次列妃玉

頸圓瑳宜粉面霞裾深染學顰衣枝頭窈窕魚雙貫

風裏踟躕鳳對飛

又似金鳳花

莫把根苗方芍藥留春不

似送將歸楊文節公有米囊花詩云鳥語風喧蝶亦忙爭傳天詔詔花王東皇羽衛無供給探借春風十日糧二者皆花木異種姑記之以資博覽

文江草木

楊誠齋為秘書少監論張魏公浚宜配享高廟與洪容齋不合二人皆求去容齋守南徐誠齋守高安而魏公迄不得配食誠齋詩云出却金宮入梵宮翠微綠霧染衣濃三年不識西湖月一夜初聞南澗鐘藏室蓬山真昨戲園翁溪友得今從若非朝士追相送何處冥鴻更有蹤又云新晴在在野花香過雨迢迢沙路長兩度立朝今結局一生行客老還鄉猶嫌數騎傳書札賸喜千峯入肺腸到得前頭上船處莫將白

髮照滄浪此去國時詩也可謂無幾微見於顏面矣其冢嗣東山先生伯子跋其論配享書藁云覆羨真得皂囊書錦水元來勝石渠但寶銀鈎並鐵畫何須玉帶與金魚蓋苗劉作亂時矯隆祐詔貶竄魏公高宗在昇暘宮方啜羨左右來告驚懼羨覆於手手為之傷暨復辟見魏公泣數行下舉手示公痕跡猶存左次魏和伯子詩云鑿坡蓬監兩封書道院東西各付渠乾道聖人無固必是非付與直哉魚詞意亦佳但當塗乃江東道院容齋守南徐非當塗也

鶴林玉

杜少陵詩云風含翠篠娟娟淨雨裊紅蕖冉冉香上句
風中有雨下句雨中有風謂之互體揚誠齋詩云綠
光風動麥白碎日翻池亦然上句風中有日下句日
中有風 同上

楊誠齋父子清介絕俗屋宇如田舍翁三世無增飾東
山病且死無衣衾適廣西帥趙季仁餽緜絹數端東
山曰此賢者之賜也衾材無憂矣史良叔守廬陵官
滿來訪入其門升其堂目之所見無非可敬可師者

因命畫工圖之而去

監懋錄

楊誠齋退休名酒之和者曰金盞露勁者曰椒花雨嘗
曰余愛椒花雨甚於金盞露意皆有為也余嘗謂與
其一於和勁孰若和勁兩忘 鶴林玉露

仁壽周氏世藏宋乾道元年告身一通敕綾經緯間隱
文思院制勅綾六字蠶色紅漫不可識但其蠶稍大
非如後世方廣三寸餘字體大小亦不一所書勅字
勢甚飛動頗似唐太宗敕後有退齋老人跋徵引甚
詳書法精楷望鍾太傅之門戶而得獻之之風神者

蓋隄筆也但跋內云其子孫恐不能守因以納於予
而目今所珍藏者仍仁壽周氏之子孫不知何時退
齋歸之實五六百年故物也今詳敕文及跋如左統
制陳敏申楚州等處劫寨立功官兵右可特授忠翊
郎勅秉義郎王全等淮濱之役氛侵盤結爾等或被
甲戰野或銜枚攻營第賞褒功咸進階秩益思忠力
以對恩榮可依前件奉勅如右牒到奉行乾道元年
五月十八日侍中闕中書令闕叅知政事端禮叅知
政事允文給事中時升中書舍人迺五月二十一日

午時都事時宗傳受權左司員外郎梁克家付吏部
尚書令闕尚書左僕射闕尚書右僕射闕叅知政事
端禮叅知政事允文吏部尚書闕吏部侍郎兼權尚
書顯吏部侍郎俊卿吉忠翊郎周俊奉勅如右符到
奉行主事徐良才員外郎克家令使趙聿書令史路
弼主管院申乾道元年五月二十一日下右宋告身
一通勅授忠翊郎周俊者當宋孝宗嗣位之初慨有
恢復中原志而與金兵互勝負告端所謂統制陳敏
申楚州等處劫寨立功官兵者時敏在魏國忠獻張

公浚督府為武鋒軍都統制浚遣之與李顯忠北伐
敏以為不可輕進其後顯忠果敗於符離敏堅守泗
州後改戍高郵與金人戰射陽湖敗之焚其舟追至
沛城復敗之正楚州立功之事乾道改元敏以功遷
宣州觀察使主管侍衛步軍司公事其部曲將校應
亦與陞擢此俊之所由授忠翊郎也告後列兩省官
或闕或署名者侍中中書令舊不除左僕射陳文恭
公康伯復相未幾薨於是年二月右僕射則忠獻公
浚薨於隆興二年八月皆在頒告前故皆闕惟叅知

政事二公署銜則錢忠肅公端禮虞忠肅公允文也
時同署者中書舍人洪文惠公适權左司員外郎梁
公克家吏部侍郎兼權尚書葉正簡公顥吏部侍郎
陳正獻公俊卿也諸公後俱相繼登相位可謂盛哉
俊吉水人居邑之仁壽鄉抑嘗謂其先自予泥田分
徙而予族自宋南渡以來若彥弼若從龍皆由武選
仕今有繼文之子過房水東亦以武功顯相傳迄今
二百七十餘年雖綾縑渝弊而文字粲然可誦俊之
後人懼其不能守也因以納於予家予勉命工裝潢

而新之且請識其故遂考其可知而缺其不可知者
書諸左方於乎觀是則宋君臣遭國家多難之際固
可感而斯文歷滄桑變更之餘尤可感也雖然楚弓
楚得亦一幸事為吾周氏之子孫者尚思所以寶藏
之哉宣德五年龍集庚戌夏五月望日奉直大夫兵
部職方員外郎退齋老人周岐鳳識 周氏宋勅記

嘉定間楊伯子為湖州守彈壓豪貴牧養小民治聲赫
然為三輔冠郡之士相與肖像祠於學宮與工部尚
書戴少望並祠伯子意不悅會除浙東庾節將行辭

先聖先師禮畢與校官諸生坐於講堂命取所祠畫
像來題詩其上云面有憂民色天知報國心三年風
月少兩鬢雪霜深更莫留形迹何曾廢古今不如隨
我去相伴老山林遂卷藏而行 鶴林玉露

楊東山嘗謂余云丈夫自有衝天志莫向如來行處行
豈惟制行作文亦然如歐公之文山谷之詩皆所謂
不向如來行處行者也 同上

吉水胡剛簡家秦一犬甚大聲振隣里其傍舍有姓劉
者夢其父言吾為犬胡評事家償所逋錢滿矣盍取

我歸劉大恨明日亟以告胡胡哀而與之犬入門三
躍而斃剛簡稽其家簿云某年月日被劉保正倚法
怙勢勒其現錢三貫六百斗米隻雞云

府志

宋文丞相督府忠義傳宋禮部侍郎直學士院權直吾
郡鄧光薦撰光薦字中甫學者稱中齋先生與丞相
同朝此傳多本於丞相所自述故特詳備而後來作
宋史又多本於此云

楊東里集

趙弼作文山傳既赴義其日大風揚沙天地晝晦咫尺
不辨城門晝閉自此連日陰晦宮中皆秉燭而行羣

臣入朝亦燕炬前導世祖問張真人而悔之贈公特
進金紫光祿大夫太保中書平章政事廬陵郡公諡
忠武命王積翁書神主灑掃柴市設壇以祀之丞相
字羅行初真禮忽狂飈旋地而起吹沙滾石不能放
目俄捲其神主於雲霄中空空隱隱雷鳴如怨之聲
天色愈暗乃改前宋少保右丞相信國公天果開霽
按正史文集皆不載此事傳疑可也信公至我朝景
泰中賜諡忠烈祠在今順天府學之右明邊廷實有
文山祠詩花外子規燕市月柳邊精衛浙江潮王元

美評曰精麗

豫章書

方文丞相海上被執時吾郡有王昂翁者丞相同舍生也即為文生祭丞相後有張毅翁者丞相門下客也始與十義士從丞相赴燕及丞相死毅翁以百金贖丞相首骨徒步七千里負而完葬焉一日過梅溪曾氏與諸友人登見山堂距丞相宅一舍許曾為丞相外家而堂名見山者寓思丞相也是夕舉酒三酬毅翁自賦摸魚子一闕諸人同聲和之有千年華表會有鶴來下之句每歌一再輒聲淚俱下至嗚咽不自

勝則相與掩袂罷去其詞至今可考惜新傳未及載而世亦鮮有知之者

劉棧翁集

子祺胡先生生之夕有大星墜舍及年四十五官於延平其家在吉水者復有大星墜舍咸怪之迨報至乃知先生以是日沒於官

楊東里集

洪武時羅學士復仁致仕歸帝賜大布衣題詩襟上褒美之又召至京師留三月賜玉帶鐵拄杖坐墩裘馬食具遣還此史臣所書也而其家子孫所傳布衣詩云性雖粗率忠直可嘉賜汝布衣放歸田里詞雖不

文然君臣一德質直無猜於茲亦可見矣顧明史缺而不載豈以其詩不文耶抑是詩非原本別有所謂褒美者而史失之耶後有博學者必能辨之

羅學士

逸事記

吉水城北于氏五世同居至于子良及其猶子士濬友

愛之名益顯 王直竹林軒記

洪武十七年上與誠意伯巡視京城因詢宋元來以身殉建康者幾人誠意曰宋臣楊邦乂死節最烈上既聞其詳乃歎曰忠臣也口占數語命誠意題其廟曰

天地正氣古今數人至死不降鐵石忠心國家標準
振後先前宜加爾封廟食萬年侍講周述聞其事因
紀以遺厥家 周庶子文集

吉水之西楊莊螺溪故宋蕭御史楊忠襄文節之故里
至本朝之初有十老者道存夏先生為之倡和而隨
者蕭之良曰從字與善衍字樂善楊氏則道濟廷章
思忠思文彥章彥敬劉氏子通合而命之曰莊溪十
老相與月為一會會必飲飲必賦詩循環然亦時有
佳客歐陽先生師尹孫庭望庭璧家季父原祿雞魚

疏筍取具隨時而文字驩樂近所未有也 春兩堂集

蘭芳夏縣人洪武中舉孝廉累遷刑部郎中永樂中出

為吉安知府寬厚廉潔民甚德之吉水民詣闕言縣

有銀礦遣使覆視父老遮芳訴曰聞宋季嘗有言此

者卒以妄得罪今皆樹藝地安所得銀礦芳詰告者

知其誣獄具同官不敢署名芳請獨任之奏上帝曰

吾固知妄也得寢

明史

解縉幼時巍然有碩大之望嘗自謂曰處其心常在熙

春麗日之間則天下無可惡之人於此想見先生襟

懷 古今長者錄

永樂中中秋開宴不見月聖情不懌學士解縉口占風

落梅一闋云姮娥面今夜圓下雲簾不著臣見撩今

宵倚欄不去眠看誰過廣寒宮殿又賦長短句一首

上覽之懽甚為停杯以待夜半月復明上大笑曰解

縉真才子奪天手也命宮人滿酌宣勸盡懽罷

即瑛

七修類稿

周文襄公忱至崑山甫登岸盛怒撻一人教授朱冕叱

皂隸令止進白周曰請姑息怒至衙門治之周從之

後召冕問故對曰下車之初觀瞻所係恐因怒傷人累盛德耳

古今長者錄

文襄撫江南嘗問一死囚欲活之無路憂形於色使吏抱案讀之背手立聽至一處忽點首喜曰幸有此可生遂出其人

同上

湖廣按察使羅銓父名世亨字景泰為人溫靜坦夷於書通大義而好禮尚賢賙貧卹疾病死喪賴之者甚衆編修楊壽夫嘗爲人言永樂庚子偕贊善陳仲完考應天府鄉試夜分一卷去取未決困就寢髣髴睹人衣冠立燭影下遽寤因憶歐陽公朱衣事取卷再閱之歎曰幾失之矣乃告諸仲完仲完曰非偶然也其家必有厚德拆名則吉水羅銓也廬陵諸先輩聞之乃傳其事以為世勸

楊文貞集

廖永壺名瀾人稱爲廖孝子父病禱於神有神語其父曰汝子孝予錫汝三齡已而果三年卒母卒哭於墓有孝焉來與瀾聲相和其後子日鑑舉於鄉鄉人以爲孝思之報云

蕭鑑廖孝子記

羅少保通在清化時遇異人授以遯甲諸書習之甚精

重謫南荒復延祕迹迨也先寇居庸遙望烟雲草木
皆若精兵雖少保公忠愛國操必勝之權然草木效

靈良非偶爾

王莽州史料

少保公之才德可兼古人者數事固守清化黎利不能
擾有張睢陽之堅抱印還中朝有蘓子卿之節破狄
居庸闕逐紫金逐懷萊使也先不敢南顧而中原安
於磐石有郭子儀之勲默識乾象潛定大計有狄梁
公之志奪門不與功成身退有張子房之識公之精
忠偉烈於中興功臣豈有二哉

紫源文集

和治間京師多傳尹蓬頭善絕粒每食輒又數升不畏
寒暑或雜乞丐宿閭閻下人無異者而士大夫爭邀
致之不去顧時時假館於水厓彭公公是時為南京
刑部尹來必索食食已相對危坐聞出幻術相調復
試以隱語後公出守兗州尹涕泣別去人皆疑公得
仙比為布政使去位無以為家年八十餘日飲水數
碗人益疑之余往見公公好議論語琅琅終日不休
非握固守氣者比公既卒讀所遺詩文皆據理道關
風俗其意欲追作者之軌度是豈溺於仙者哉尹之

戀戀蓋知其中有所主無復塵埃垢穢之迹而世之視公者真若羽化亦非知公者矣

羅文恭水厓集序

谷平先生義姐傳云義姐姓袁氏字成妹佃人女也稟姓貞醇無二予姊氏及予之幼義姐抱持甚勤予弱冠隨父家漢東大父母在堂義姐以服事為已任外供薪水內供炊爨悉心幹理勞苦萬狀時其母再適他姓頗饒裕欲以義姐適後夫孫義姐毅然不可每具飯進主而自食糠粃正德丁卯予發解攜妻子歸事大父母義姐年已四十餘妻厚遇之欲為擇配義

姐曰一心事主不欲配人也既而予第進士歷官浙粵皆同行其在家在官凡事始終無少懈噫婦人之勤勞或為夫或為子孫義姐何為哉有言性不善者試以質之

李谷平文集

周邑侯廣正德間治吉水時贛州流賊自大帽山突出由雩都抵新淦執其守臣入永豐永豐令逸而逃賊縱火焚縣治殺掠民財勢猖獗甚永豐壤隣吉水吉水丞簿懼欲奔竄公叱而責之不敢動士民復洵洵無固心公亟歃血盟之神衆志翕定咸出死力効命

於公公為防禦之具晝夜不懈明斥堠謹間諜訓練
土兵以期進討賊聞之潛師踰境土兵邀擊之斬獲
數十人賊不敢逼邑賴以完後藩臬上軍功督府不
及公公亦不膺之意 王巖集行狀

少保伯温毛公征安南夷人作浮萍詩貽公云錦鱗密
密不容針帶葉連根未計深曾與白雲爭水面豈容
明月墜波心千條雨線穿難破萬陣風濤滾不沉多
少魚龍藏裏面太公無計下鈎尋公和之云隨田逐
水冒秧針到底原來種不深空有根苗空有葉敢生

枝節敢生心寧知聚處焉知散但識浮時不識沉大
抵中宮風色惡掃歸湖海竟難尋夷人見之而服 毛
襄懋逸事記

羅念菴大魁時年才弱冠其外舅官棘寺卿報初下喜
甚趨告先生曰喜吾婿乃幹此大事先生頌發赤曰
丈夫事業不知更有多少在此等三年過一人耳奚
足為大事耶是日猶自袖書借黃何二孝廉聯榻蕭
寺論學焉 得樹樓雜鈔

羅念菴先生屢召不出聶雙江貽書勸駕先生答書有

云若憐其早歲登科立朝再暮枯槁山林不無可惜
此則待之太卑吾儒名教眞實在我外物奚與哉想
見先生大行不加窮居不損氣象彼學道半生胸中
不能除狀元二字當屬自待過卑耳殊不知性分上
萬物皆備天爵之榮固勝却人爵遠甚也

袁君弘妙

貫堂餘談

毛朴字文甫少保東塘公冢嗣也為人渾厚坦易滌去
華靡一任天真粗衣敝履獨遊寰區人莫知為少保
子或有侮慢者恬不介懷油然而與之偕嘗作百忍圖

書白沙贊於上凡遇衣冠士輒袖出贈之觀其所為
蓋嘗堅忍於情而深於內修者矣

王夢峯紀善新編

劉龍山為舉人時家貧甚夢有人告之曰此時正好行
善事後理平樂又夢如前曾有飢民數百奪官倉糧
時以為叛數百人皆論死龍山多方為補官糧無虧
曰民飢犯死以求生官弗賑民何尤焉治數人而已
餘皆得活又一獄數十人已置法龍山宥之謂殺諸
囚可得顯官不則罷職寧罷去其妻助其行卒以是
罷歸舟次夢神人贈以玉筍三枚後其孫應秋解元

探花秋子同升狀元卒符前夢

府志

字河劉君名教為邑諸生嘗入縣領學糧三金遇民乞
賑於官即以市穀濟飢者且言惠出於縣令後為溫
處兵備凌公塾師既辭歸會兵以給糧後期將誦諸
將慮變作告於字河求一言字河辭不可而潛入語
其狀凌公即日以便宜發粟給軍諸將追奉千金為
謝却不受其隱德若此而竟以貧困終

泉湖山房稿

嘉靖間同水鄉羣虎暴至齒人畜無虛夕衆募人捕之
劫於威無敢應者有二虎白晝自山投圃中偃卧狀

若醉擊以瓦石起張吻向人旋自止人稍狎觀之犬
隨入爭前啣其尾人始操挺刃相逼其一逐入室伏
床下有從壁隙以戟鉤其掌操戈者自喉洞胸胃出
尾下尺許死其一他走半里盤辟垣屋外踞而與人
攫舌貫刃抵地腰中挺死二害去頃刻間虎患遂平

羅念菴虎記

萬歷間御史錢一本疏請從祀羅洪先於文廟既而報
罷不果行學者皆以為憾

錢太僕奏疏跋

南京宋忠臣楊邦乂葬江寧歲久漸湮萬歷間應天巡

撫宋儀望為封其墓載其祠於祀典

明史

始邑令徐侯清軍時躬自校讐刊刻吉人飲大澤者幾二十年虎林刺史張公恐板久而訛捐俸命縣勒石司理毛公晷篆精心剔蠹復加詳覈竭晝夜之力始得成事三君子不惟殫財供剗之資且竭心思絕魯魚之弊吉何幸而沐湛恩如是嗟乎彼巧文舞法者雖衆然其籍具在石可泐也諸君子之澤不可磨也徐公名學聚蘭谿人張公名鳴鷄錢塘人毛公名

堪江寧人

鄒忠介書數寶軍碑後

予庄前舊有二大樹當門鬱鬱盤里許一日堪輿者至曰大樹當門召疾命伐之是夕妻及予夜夢不祥亡何妻江雙男胎墮因以其說詢於友友言昔有一訓導在吾吉伐衙齋後樹訓導不數月終諸樹夜作鬼吼因歷舉伐樹數事夫樹豈果有靈耶抑沐雨露照日月者久於義固不容輕伐耶何堪輿家往往以是誤人予因作伐樹戒以警之

鄒忠介伐樹記

槐川子邑諸生徐炬也嘗贄而謁諸先達談名理辭訥然不能出諸口然內行甚修第病當炙第苦炙槐川

子手炙無苦弟始炙弟亡禮孀撫孤如弟存日此雖
篤行之一端然亦未易及也

鄒忠介槐川子銘

彭老峯者水厓先生後裔也水厓遺古書數十卷老峯
兄弟發而讀之自負甚壯早歲挹趨羅文恭聶貞襄
二先生門所著有四合燕語一曰龍門步響二曰史
館鉅毫三曰樂部片瑣四曰藥林國老為諸生七試
不偶人以為屈不知老峯得一當其英雄慷慨之氣
或摧阻風塵即稍稍自豎沉酣六籍發為著述未必
若是富且郁也顧同儕多憚老峯有心疾而不與親

子竊憾之

鄒忠介集

李清惠鎮昌平攜妾曹氏之任歲戊寅傳聞兵至燎火
達於近郊時兵單餉匱不可守曹氏將引決清惠止
之曰勿急也設有不幸予令箭至闔門自焚可耳曹
氏乃積薪於門身着油衣日夜燃燈以俟既而兵退
竟無恙以歸

勺亭瑣言

廬山三石梁自太白遊後千載人罕至者相傳以為仙
境先殿元末第時遊廬山嘗至其處徘徊半晌方歸
遂作三石梁歌紀其幽異以示山僧僧即隨所言踪

迹之終不能達

劉孟欽三石梁詩跋

姑蘓文文啟未中禹元時有相士曾預決之及文啟既中之秋相者至吉邑謁蕭伯玉時晉卿先生在坐伯玉戲之曰劉孝廉可作禹元否曰真禹元也惜眉間有深痕他日國事將壞乃為之此忠臣也將與宋文丞相等在坐者皆嘆其妄相者佛然去後言卒驗

劉文忠年譜

劉孝則先生自天啟元年鄉舉五上春官不第屢欲赴選俱為友人所阻至崇禎九年已決意懸車矣冬至

往拜祖祠夜夢北京貴官持紅刺來迎先是萬歷壬午文節公曾夢北京城隍相迎故癸未登第先生亦心異之與家人語未畢有友人書來敦迫勸駕且云已為備貲斧不得已行至章門風不利猶思返又為友人所尼明年廷試乃獲第一

楊鑑南洲逸事記

吉水大洲姓王者有婦人三十餘歲順治丙戌年遭高兵傷左臂而死丁亥年二月一夜雷雨大作墓開棺裂婦人猶活濛濛坐雨中詰早觀者如堵以粥飯之至晚復死余家蒼頭目擊亦可異也嘉靖年間朝邑

太守劉偉死已二十年其親友韓邦奇復見之與之
飲食亦不敢問其何來也再生事太平廣記所載甚
多人以為幻此兩者最確但其理不可解 李一偉句
亭瑣言

余里人楊氏夫婦以同年同月同日生生七十一歲以
同年同月同日死從古未有之事史冊亦罕見也 同

上

丙辰夏予避地折桂之高原時山寇蜂起里中義俠胡
飛白彭堅臣倡鄉人團練為堵寇固圉計誠義舉也

越兩月有賊首黃某者道遇飛白執而殺之聞者無
不流涕自是團練解而山寇肆掠於百里外矣予悲
之而賦其事 廖迪恂義俠詩序

康熙戊寅己卯間李醒齋先生為大司農方 文時

皇上博綜全書海內文詞皆得上邀 御覽先生奉父

少司馬詩集十六卷母朱夫人隨草六卷進呈一日

少詹陳元龍捧 毓慶宮手諭云司農父梅公詩集

皇父深贊為當今第一流又其母亦工詩有婦解吟詩

子讀書之句急欲得其專集一覽先生隨奉前集以

進庚辰

賜御書五言排律詩又

賜御製詩集樹

滋堂額唐人詩大幅盧溼壽星見詩金扇李白清平

調黃庭堅杜牧山行截句又

賜御製南苑曉雪詩

對聯二詩幅一大福字一及泥金扇書

御製春晝

詩先甲戌為工部尚書時

賜御書天馬賦前後獲

御書共十有三種寶器則松花五雲硯玻璃缸壺盃

等又

賜御銘松花硯玉頂紫檀匣珍珠則不可枚

舉雖

皇上眷禮儒臣而醒齋先生受恩尤重實一時異數也

李醒齋墓誌

成化間有羅良者羅慶同子邑諸生也嘗入縣城經月

舟橋得遺金一囊視封識故人李某貸之以需次者

也乃之李氏李氏之父泣且告以故良笑曰無傷人

得金將自還父曰世無古人吾安所求之良於是出

金相示李氏男婦皆羅拜於庭願分半以謝固却之

竟去李以是得官而良以諸生至老卒

紀善新編

康熙初紹興陳侯之蘊令吉水父母妻及弟相繼而亡

陳侯罷官欲扶櫬以還則力不能給欲葬此則不可

乃身先還浙而寄櫬於龍華盤龍二寺期明年來迎會陳侯病卒吳逆煽亂吉安道梗於是旅櫬者三十餘年風雨漂搖棺木朽腐邑諸生趙明珠等見而憫之以狀啟於後官願為之卜葬官允所請乃改棺購地葬之如禮且為立石以識棺內諸物俱呈於邑庫久之陳氏子孫來扶櫬感其義登堂拜謝而明珠已先卒矣陳氏子孫為痛哭而去明珠邑廩生有文名將與貢而卒

陳氏義塚記

康熙間有客攜一猫來卧病三曲灘旅邸不數日卒逆旅主人嗚於官官往驗無故命掩而識之其所有物俱存於公將行矣忽猫來啣邑令衣邑令疑之起隨行登樓仰爪簷前椽瓦間若有所訴發視得白金若干及契券之屬詢之主人主人驚悸無語蓋客既死主人欲匿此物以自潤為猫所發乃杖主人而藏銀券於庫後其家人來扶櫬携銀及猫以去吉人因呼

為義猫

彭端厓文江雜紀

雍正三年四月至七月吉邑囹圄空虛致為常平糶穀之所時令斯土者山西安邑劉公仁恕也劉性剛直

行法嚴汰冗役除積蠹查匪類懲訟師毫無所顧忌
民有訟者定以五日審結無情之詞人不敢握管嘗
有民欠賦為隸所執詢之執於何所曰城中曰彼來
城中納賦耳汝乃執之耶詢諸民果然曰索錢否民
以實對乃答隸而償其錢其他政刑多若此以故閭
閻安而胥役貧民皆畏法爭完賦稅構訟者日稀老
奸猾吏皆坐食無事於是怨謗朋興遂以事被吏議

去官

同上

同水鄉州橋羅氏二女一名九妹一名十妹從兄弟也
先是二女有姊年稍長而二女方幼三人者深相得
見比隣女長各嫁去因共約永不適人以養父母迨
姊及笄父母強之遂賦于歸慶會醮送二女未嘗至
也明年姊產男以果食遺二女怒而置之地時時唾
其負約後二女亦長父母又將強之二女含意莫敢
言父母雖知之亦終不聽乾隆十三年閏四月歸期
已各卜日因相攜痛哭不飲食冀父母一悟以終其
志久之不能得遂夜半沐浴更衣解帶同縊而亡鄉
人爭傳其事予聞而悲之為作惜二女詩

王立周惜

二女詩序

文昌張姓有賢婦曰龔氏夫貧家無期功之親上有老
母無以養乃謀食於四方時龔氏歸方年餘事姑甚
謹朝夕織紵以供食已而生一女越三年雍正乙卯
正月夫扶病歸龔氏侍湯藥晝夜不暫息至六月夫
將死以目睨氏氏泣曰設不幸必從君於地下夫搖
首未及語而卒氏撫屍哭曰我知君心矣老姑在妾
不敢從君也乃毀容垢面憔悴異常時而事姑孝謹
曲意仰體惟恐傷姑志丙辰歲歉值姑病氏拮据萬
狀日以甘旨奉姑而已食糠粃見者皆為泣下母氏
憐其苦慰諭之氏泣曰兒辜父母鞠育恩至今日死
生命也願勿以兒為念數月姑卒氏出所有器具盡
貨於人為姑喪葬費或問其故氏曰予將有所之無
用此物也既而大事畢更擇壻致女於壻家復之母
氏及夫族娣姒所各叙生平語且以墳塋為託衆莫
識其意既而返室哭於夫位前再拜自縊死張氏之
族人憫其賢公出資葬之越十三年客有言其事者
訪之信然竊懼久而失傳也故作紀事以表之

雜紀

古樓州朱貞女名總煩年十七所字之夫蕭壯行以疾
亡貞女聞之私泣願往視含殮母憐止之貞女乃引
刀自刺父母見其志決從而往時已殮入棺貞女啟
視痛哭欲以身殉姑與衆婦初聞貞女來已驚異至
是阻愈力不得已乃拔髮納棺中誓不他適祭奠畢
父母強之歸遂與母同處日夜悲泣服喪者三年時
念其翁姑老往省視甚孝然以夫家居室不便於起
居仍返父母室如是者二十八年矣近父母俱亡依

寡嫂以度日往來省視如曩時今歲庚午年四十有
四以守貞年例未符未敢上請旌表然貞女事彰彰
在人耳目予恐他日遂廢置不克闡揚故紀其事以

俟
同上

城西孝廉名飛鵬姓朱氏幼有至性及長通達時事一
邑之利害山川水利皆所究悉既登賢書益期為有
用已而膺薦入吏部習政日學治事夜則著書不數
月書成數十萬言名曰萬年保泰策上之於冢宰冢
宰以為書生徒知古耳未可言事故之歸付書於火

既而他書之在家者亦被焚邑人士言飛鵬事父母甚孝處家族多仁愛食貧自力於學於書無所不讀為文婉而善入顧其自許過高往往酒酣耳熱言及古賢皆可感事輒中止不語其心苑結若有所篤至者亦其性使然也既被放年餘以瘵疾卒於家鄉黨因其好學多惜之同上

乾隆壬戌十二月朔虎溪陳氏支祠火燒燬二十餘家皆極貧者衣食無所資將轉徙於四方其宗人止之共議卹濟之術家稍裕者出穀若干衣若干其次解衣衣之分食食之而又空大宗祠為棲息地如是者數月至農事作諸人各得食其力乃已時予以講約過其地目擊斯事歸而言諸邑令徐侯大坤侯嘉歎之為書睦族可風四字貽其族以為勸同上

三曲灘之渚有王漁者康熙癸巳夏水漲不利於網罟穀價騰貴家無所衣食其父嘗為幕中客購文本棺一具藏之矣適邑令湯喪偶求美棺或以是棺應既成付價且百金玉漁聞之趨歸跪請曰父辛苦終身惟存此物復售去男終不忍寧餓死決不為此父

不得已聽之已而水退漁所獲常倍於昔計三月積數十金是年秋其父死以是棺殯且藉贏金為喪費未幾王漁亦卒或言王漁名禹魁以父歿瘠甚得疾死 同上

文昌鄉有蕭鍾蕃者當康熙乙卯丙辰間憫土寇害欲集義勇保障鄉里既而賊來眾民皆懼各散去鍾蕃負父避寇於他所中途為盜所執荼毒備至將殺之適有羣盜自後至一人前熟視曰此子恩人昔歲飢予嘗受其惠得不死今願為彼乞命請賞之自是歸為善益勤年三十一竟卒

蕭崇泰者亦文昌人三歲無父母寡嫂張氏年二十餘誓志守節撫崇泰至成人嘗因崇泰疾遂茹素終身崇泰長事嫂如母弗敢稍違嫂卒月朔望及忌辰必茹素報之康熙辛未有李姓者貸崇泰銀負約又往索李言待嫁媳乃能償崇泰惻然為毀其券不復取其他所行亦有類此者人往往稱之

康熙中文昌陳氏有名鎬齡者多隱行或貸鎬齡銀三十兩以一婢見償問之則山東良家子也鎬齡為擇

配俾之得所而不取其值世以為長者

羅元掄邑諸生也雍正癸卯寓章門旅舍有客行李蕭然自遠至問之吉邑陳侯從兄也時陳侯已罷官元掄告以故客聞而失色既而從者有怨言客泣下不語元掄再詢之乃以實告家貧不能自存假從者資斧若干至此期至吉償之今彼且索原贖求去予途窮不能復生人世言已愈泣下元掄婉言勉慰稍間以白金三十俾客曰持此遣從者併為歸路費何為泣也遂別去不復問及陳侯北還過南昌聞其事始

義元掄為人

同水鄉劉竹邑庠生喜為善事康熙中祖祠毀於火力薄不能重建獨捐已田二十畝及館穀二十四金擇族之誠實者使歲收租營什一利雖自往貸亦必行息與眾同積二十餘年儲銀四百餘兩因以建祠及祠成眾欲以田歸之不受奉為祭祀費復捐貲以滋丹蘄竹有庶弟幼而父卒遺教田產兄得三之二弟三之一及弟長竹出田產均分之且持遺教告諸廟焚於神前自分產後歲贏食穀可二十餘石與家人

約此二十餘石別儲之至四五月以給族之無食者
如是行十五年迨子孫日衆食不足乃已月朔日集
族人三揖相見為訓詞宣之積久漸成帙名其書曰
屋裡話今閱其詞雖不盡雅馴然非篤於自好者不
能為也年七十三舉鄉飲正賓又十二年乃卒

洪同周氏子名成黼幼有至性年十八母歿成黼哀病
過於常人父勉之食始稍食既葬日哭於墓者三抵
家復號泣無間積一月餘遂羸憊以死方其未死也
人勸之以揚名顯親曰吾心不能自已矣及疾革語
弟善侍父復曰我今得見母矣遂嗚咽而絕時乾隆
七年九月也

右近時諸事有見於時人詩文者有本家呈繳事
實與輿論相符者俱為訪確登載於有書者則註
否則缺以傳信焉

